



Ehndor

(ASP14-07.07.1996)



I giob do-n-andora all reocht,
säg ehndor, i vorstoh öü schleocht.

I trei do-n-andra 's Wort nid om,
säg ehndor, daß nid mit i komm.

I lo di andro allä vor,
heb ehndor ihna uf no 's Tor.

I setz di andoro nid us,
vorkröch meh ehndor wio-n-a Mus.

I stoh do andora vor nünt,
lüß ehndor dioson, wenn ar künt.

I hoß di andoro nio schleocht,
gloub ehndor, daß ar sei im Reocht.

I mach do-n-andora all Blatz,
i flüch fasch all mit a-ma Satz.

I red do-n-andora nid dri,
denk ehndor, as künt scho so si.

I muon nid, daß di andro lügond,
lüg ehndor seolb,
daß d'Feotzo flügond



(ASP140-22.05..96)



Trou do Lüt

(ASP141-27.06.1996)



Mach 's so wio-n-i ...und trou do Lüt;
schlag i, wenn eopar d' Hand dor büt.
Gang du an Schriott uf dioson zuo,
dänk nid, as küntit 's diosa tuo.

Mach 's so wio-n-i ...und gloub do Lüt;
will jedom däs roß viel bedüt.
Wenn d' uonom nünt Schlechts trouascht zuo
würd diosa däs ou dir nid tuo.

Mach 's so wio-n-i und tuor wio d'Lüt;
Die Gschiedoro heand hiortä Hüt.
An woacha Kern, an hiorta Griond
ischt d' Art von Lüt, wo menschlä siond.

Mach 's so wio-n-i und red nid z' viel;
bim Reda ischt all Dumms im Gschpiel.
Säg jo do Lüto nid was dänkscht,
will d' sus, do Umuot uf dä länkscht.

Mach 's so wio-n-i ...dänn loufscht nid Gfohr,
ko Gfohr fürwohr,
Gift druf nio kascht,
daß ganz z'mol
.... blös mä seolb dä mascht.





tagsüber
(ASP142-08.07.1996)



Tagsüber würscht gschobo,
würscht gschoßo und druckt,
du mirkscht-os fasch nid,
und gad däs ischt varruckt.
Du muonscht gär du seolbor,
du heiischt-on gwählt
do Druck,
ohne dän dir do Ufhänkar fehlt.

Am Morgo goht ´s los,
wenn do Weckar goht ab,
obwohl d´schlecht heascht gschlofo,
arwachascht nid drab.
Wenn ´s Wieb dä dänn beutlat,
jo hörscht dänn du nünt,
ischt nünt mä mit schlofo,
obwohl ma ´s eotz künt.

Am Vormiottag ´s Schaffa
goht flott vo dor Hand,
was afallt, ischt dringond,
alls goht inanand.
Das Vordorscht ischt z´hiondorscht,
das Hiondorscht pressiert,
ma biegat ´s und buschlat ´s,
as goht as wio gschmiert.

Am Miottag bim Eosso,
do röüt us fascht d´Zit,
will sus as zum Röschta
ko Schlöflä mä git;
ko Zit blibt dom Gaumo
zum Gnüßo das Bescht,
wer schaffat, muoß Eoßo,
nid gnüßlä, blös fescht.

Am Namittag bruchscht scho
die allarletscht Kraft,
an so volla Mago
heat jedon no gschafft.
Bioscht erscht wiedor mugg,
mein-Gott, heascht no z´tuo !
Und dänä, wo trümmlat heand,
gond eotz scho huo ?



Gierig, dumm

(ASP143-08.07.1996)



Deor wo muont, ar bruch gär alls,
ischt, i muondäs jedofalls,
gschtrofat seolb mit sieror Gier;
und
z' allar-undorscht dur bi mir.

Deor wo muont, ar wioß gär alls,
ischt, i muon däs jedofalls,
dümmor as däs Gott arloubt
will
ar muont no, daß ma-m 's gloubt.

Deor wo muont, iom grot gär alls,
heat 's nid probiert, no jedofalls,
ischt
beschtofalls belehrt no worro,
und gfallo bös uf sienä Schnorro.




(ASP143-08.07.96)



Eopar heat min Bleiwieß gno,
eopar heat 's Gschier fallo lo
eopar isch 's, wo alls vorleit,
eopar isch 's, wo 's Züg vorheit,
eopar heat mi Werkzüg, alls,
eopar d' Bommschär jedonfalls,
eopar heat di tür, alt Schüssol
eopar gär do Hustürschlüssol,
eopar heat mor 's Züg vorsteckt,
eopar heat mä z' Nacht abdeckt,
eopar heat mor 's Bier ustrunko,
eopar 's Häß im Pap vorstunko,
eopar 's Liocht nid glöscht bim go,
eopar 's Wassor loufo lo,
eopar heat mi Züg vorloro,
eopar heat do Schnaps roß gschporo,
eopar heat-on z' roß vortreit,
eopar Huomligs Züg usgseit,
eopar schnarchlat überlut,
eopar losat zuo kon tut,
eopar heat do Tisch vordreockat,
eopar us-or Schüssol gschleockat,
eopar Dreock i d' Stubo treit,
eopar heat mi Häß agleit
eopar heat sä gern vormeosso,
eopar d' Brüllo all vorgeosso,
eopar heat vorgeosso rummo

eopar brucht uon all, an Dummo,
eopar heat a klä uon glo,
eopar mir i d' Hosa to.

Eopas siobt a Wieb nid i.
gär alls ka doch i nid si.



(ASP/144-10-3-96)



am 1. Mai

(ASP145-28.04.1996)



As heat amol am erschto Mai
an Igol demonschtriert.
Ar ischt, wio sienä ganz Partei,
mit Stachla ufmarschiert.
Was Stachla wert siond, wioßand dio,
wo seolbor Stachla händ.
Gnuo Stachla, gloub 's, händ d'Igol nio:
will all no meh sie wänd.

As heat amol am erschto Mai
an Esol demonschtriert.
Ar ischt, wio sienä ganz Partei,
für 's Langohr ufmarschiert.
Was Ohro wert siond, wioßand dio,
wo eopas höro wänd.
Lang Ohro störond seolb uos nio,
blös dio, wo andrä händ.

As heat amol am erschto Mai
a Kelblä demonschtriert.
As ischt, wio sienä ganz Partei,
vo Riondor ufmarschiert.
Was Kelbor siond, däs wioßand dio,
wo seolbor Kelblä händ.
A Riondviech seolb, stört 's Kalb si nio:
..... was blös die andro wänd?


As heat amol am erschto Mai
an Lämmälä demonschtriert.
As ischt, wio sienä ganz Partei,
vo Schöfo ufmarschiert.
Was Schof si wert ischt, wioßand dio,
wo Lämmor om sä händ,


an Schof seolb,heat gnuo Lämmä nio,
wo mit-om plära wänd.

As heat amol am erscho Mai
an Bürger demonschtriert.
Ar ischt, wio sienä ganz Partei
für d' Arbat ufmarschiert.
Was Arbat wert ischt, wioßond dio,
wo seol ko-n-Arbat händ.
Gnuo Arbat töüond blös dio hio
wo nid gern schaffa wänd.

As heat amol am erscho Mai
an Staatsma demonschtriert.
Ar ischt, wio sienä ganz Partei,
für d' Freiheit ufmarschiert.
Was Freiheit ischt, däs wioßond dio,
wo seolbor 's Säga händ,
und drübort reda söttischt nio
will diosä sus ou wänd.

As heat amol am erscho Mai
an Wähler resigniert,
ischt nid marschiert blös für d' Partei;
heat wirklä demonschtriert.
Was wählo hoßst, däs wioßond dio,
wo ou scho nochdänkt händ.
Däs siond, vo mir us, dio wo nio
blös nochärenno wänd.





Nid all

(ASP146-22.05.1996)



As sei am bescho, wenn 's uom grot,
daß ma-n-an Stritt fascht all omgoht,
uon uofach flüch, links liggo lot.

As goht, will däs viel Gschiedor sei,
an Händol jeda Schlau vorbei,
will er dofür d' Begabung hei.

As sei all gschiedor as an Stritt,
daß ma vo diosa d' Dämmä lit,
will 's fascht kuon ohnä Vogol git.

As flücht fascht kuonna all do Zwischt.
as schaffat kuonna blös mit Lischt,
obwohl ar wüß, was besser ischt.

As wüß a jeda, alle stimmt nio,
und lüß uom reocht, tät reocht um gio
ar müß ou gär nid reocht all hio.

I hio dio glich Philosophie
säg jedom, wo mor redat dri
du heascht jo reocht, i schieß dor dri.



(ASP146-22.05..96)



Händlä gio

(ASP147-22.07.1996)



Giob schüo 's Händlä! Scho bin Kiond,
hoafst as, luu, wio brav sä siond.
Scho do Gobo bläüt ma i,
Händlägio, däs müoß so si.

D' Kiond, sie miorkond 's, gloub-ä, früoh,
's Händgio, däs ischt nid blös schüo,
liechter lüß ma 's Händgio, bliebo,
will as künt uos seolb beschriebo.

Kascht druf goh, bi-n-meischta Lüt,
s Handgio uf ihr Weoso düt.
Beldscht-as d' Hand dor uonna git,
mirkscht, as ischt nid her sa wit,

Streckt dir uonna, vor ar do,
d' Hand entgegot, kascht druf go:
will ar eopas. Schluß döt drus,
däna nühm dä, wenn 's güng, us.

Hebt ar d' Hand dor her wio Kitt,
saftlos, wio d' däs seolb nid witt.
Mit sä seolb, uf jedo Fall,
woafst ar nünt az'fohot all.

Däna wo dä nid uslot,
ganz noch zöü dor zuochä stoht,
brucht dä, zum a klä ufbouo,

sie abgschtandos Seolbschtvortrouo.


Eopas wo all Lüt nid wänd
siond vorschwitztä, füchtä Händ.
Und du kascht ou schlüßo druf,
däna regt sä läpisch uf.

Stärrig Händ, ma kennt ´s an Gloacho,
dänä siond a siochers Zoacho
vo-ma klobigo Charakter,
kurz gseit, uf a grobs Kalfaktor.
Händ wio Pötscho, rund und dick,
siond nid vornehm, siond nid schick.
Däna isch ischt, i süg, vorfreoßo,
dänon kascht, i süg, vorgeoßo.

Druckscht a klä und er druckt z´ruck,
schlüß us sienom Händedruck,
´s Drucko, däs ischt sienä Lischt,
will ar an Vordruckta ischt.

Druckt dor uonna d´ Fingor zämmä,
wio mit a-n-ar Schrufstock-Klämmo,
Woascht dear tuot däs blös dofür,
will ar heat blös Kraf, ko Gschpür.

Wenn d´, vor d´ uonom ´s Händlä nischt,
roß uf alls guot obacht gischt,
würd dor so, wio mir, bald nio
kuonna gern mä ´s Händlä gio.





An Trick

(ASP148-28.07.1996)



Do Karl seit zu Franzo
i säg dor min Trick,
wio d' los würscht din Ranzo,
du bioscht jo viel z'dick.

Heascht d' z' nacht, noch-om Jassa,
do Kühlshrank im Sionn,
dänk, däs tätit passa,
as ischt nünt Gschieds dion.

Ma goht zwor agfreoßo
mit Hungor i 's Bett,
fiondt nünt Gschieds zum Eosso,
ou wem-ma no wett.
Do Franz seit, däs mach-ä,
wenn z' nacht i komm huo.

D' Ergebnis siond schwachä,
Franz niommt ehndor zuo.


Hei Franz, säg was tuoscht ou,
däs ischt jo gelacht,
wenn i dä so aschou,
wio heascht däs ou gmacht.

I hio, wio d' mor groto
befolgt din Trick,
A jeda vorstoht-o.
Blös i, i wüor dick ?

Wenn z' nacht i is Bett sött,
dänn würd as mor z' dumm,
will nünt Gschieds i fiond döt,
do Kühlschränk i rumm !



(ASP/148-28.7.96)



's erscht mol

(ASP149-09.07.1996)


Bioscht am Berg das erscht mol domm,
frogascht numma dä warom
hio-n-ä 's Schwitzo uf mä gno.
D' Hauptsach ischt, iotz bio-n-ä do.

Bouscht a Hus zum erscht mol,
mirkscht, wenn d' fürtig bischt uf z' mol,
ma heat d' Malta z'wenig gmischt.
D' Hauptsach ischt, wenn Fürschtwi ischt.

Schtoscht, i hoff däs, du fürwohr
's erschtmol vor-om Trau-Altor.
D' Hauptsach, eotz stellscht du do Ma,
si heat nochar d'Hosa-n-a.

's erscht mol, wenn d' an Gob arzüchschet,
mit-om uf-om Bodo krüchschet.
D' Hauptsach: söttischt Vorbild si
Schuld bioscht d' eh a-n-allom gsi.

Fehlar macht ma 's erscht mol gnuo,
git 's ou s' erschtmol no liecht zuo,
D' Hauptsach ischt, alls wo ma tuot,
würd 's erschtmol to . . . und 's zweitmol guot.



(ASP149-09.07.1996)